

## Omba Asubuhi

Bwana, asubuhi utaisikia sauti yangu, Asubuhi nitakupangia dua yangu na kutazamia—**Zaburi 5:3.**

Pumzi ya kwanza ya nafsi inapaswa kuwa kuwepo kwa Yesu. “Pasipo Mimi,” Anasema, “hamwezi kufanya neno lo lote.” Ni Yesu ndiye tunayemhitaji; nuru Yake, uzima Wake, Roho Wake, anapaswa kuwa wetu daima. Tunamhitaji Yesu kila saa. Na inatulazimu kuomba asubuhi kwamba, kama jua liangaziavyo nchi na kuijaza dunia kwa mwangaza, vivyo hivyo Jua la Haki liweze kuangaza katika vyumba vya akili na moyo na kutufanya wote kuwa nuru katika Bwana. Hatuwezi kufanya chochote bila uwepo Wake hata kidogo. Adui anajua pale tunapojiandaa kufanya mambo yetu bila Yesu, na anakuwepo hapo, tayari kujaza akili zetu kwa mapendekezo yake maovu ili tuanguke kutoka katika utifu wetu; lakini ni shauku ya Bwana kwamba tukae ndani Yake hatua kwa hatua na hivyo kuwa wakamilifu ndani Yake....

Mungu amekusudia kwamba kila mmoja wetu awe mkamilifu ndani Yake, ili tuweze kuwakilisha kwa ulimwengu ukamilifu wa tabia Yake. Anataka tuwekwe huru dhidi ya dhambi, ili kwamba tusiibishe mbingu, ili kwamba tusimsononeshe Mungu Mkombozi wetu. Hataki tuukiri Ukristo, huku tukishindwa kujiweka tayari kwa ajili ya neema ambayo kwayo anaweza kutufanya watakatifu, ili tusipungukiwe na kitu.

Maombi na imani vitakamilisha kile ambacho hakuna mamlaka duniani inayoweza kukikamilisha. Sisi ni mara chache, katika mambo yote, kuwekwa katika nafasi ile ile mara mbili. Tunaendelea kuwa katika mandhari mpya na majaribio mapya ya kupita, ambapo uzoefu wa zamani hauwezi kuwa mwongozo wa kutosha. Mara chache sana katika mambo yote tunaweza kubaki katika msimamo uo huo mara mbili. Lazima tuwe na nuru idumuyo kutoka kwa Mungu. Yesu hutuma daima ujumbe kwa wale watakaoisikiliza sauti Yake.

Ni sehemu ya mpango wa Mungu kutupatia, katika kujibu maombi yetu ya imani, kile ambacho hangetupatia kama tusingeomba hivyo.